

Newspaper	Utusan Melayu
Date	17/08/2017

## Manifestasi usaha kerajaan bantu rakyat

**SEPANG 16 Ogos** - Program Perumahan Rakyat (PPR) Ampar Tenang di sini merupakan antara manifestasi usaha kerajaan dalam membantu semua golongan masyarakat secara inklusif.

Perdana Menteri, Datuk Seri Najib Tun Razak berkata, projek yang dijangka siap pada Julai 2019 itu membuktikan kerajaan Barisan Nasional (BN) sentiasa memperjuangkan untung nasib semua komuniti.

"Terlaksananya projek ini menandakan berakhirnya perjalanan dan perjuangan penduduk di sini untuk memiliki sebuah rumah yang wajar disediakan oleh kerajaan kepada mereka.

"Ini sebagai mengenang jasa terutama masyarakat India yang bertungkus lumus mengerjakan estet sejak sekian lama yang menyumbang kepada perit payah terhadap negara," katanya ketika berucap dalam Majlis Pecah Tanah PPR Ampar Tenang, di sini hari ini.

Yang turut hadir, Menteri Kesejahteraan Bandar, Perumahan dan Kerajaan Tempatan, Tan Sri Noh Omar dan Menteri Kesihatan merangkap Presiden MIC, Datuk Seri Dr. S. Subramaniam.

PPR yang akan dibangunkan Kementerian Kesejahteraan Bandar, Perumahan dan Kerajaan Tempatan itu melibatkan kos pembangunan sebanyak RM60 juta bagi pembinaan 400 unit rumah teres satu tingkat termasuk



**NAJIB TUN RAZAK** melihat model rumah selepas menyempurnakan Majlis Pecah Tanah Program Perumahan Rakyat (PPR) Ampar Tenang di Dengkil, Selangor, semalam. Turut hadir, Noh Omar (dua dari kiri). - UTUSAN/RASHID MAHFOF

kemudahan balai komuniti serta tapak rumah ibadat bukan Islam.

Harga jualan satu unit PPR itu adalah RM20,000 menjadikan jumlah subsidi kerajaan bagi setiap unit adalah sebanyak RM130,000.

PPR Ampar Tenang dibina khusus untuk bekas-bekas pekerja ladang Perang Besar, Medingly, Gollaway dan Sedgely yang tinggal di Rumah Kos Rendah Taman

Permata di Dengkil.

Dalam pada itu, Najib yang juga Menteri Kewangan berkata, tanpa ladang Perang Besar, Medingly, Gollaway dan Sedgely, tidak akan wujud Putrajaya seperti yang ada kini.

Oleh sebab itu, kata beliau, kerajaan pada 1996 membuat keputusan untuk membina rumah-rumah teres setingkat kepada 400 bekas pekerja estet terlibat.

"Janji itu dibuat pada 1996 ketika Tun Dr. Mahathir Mohamad menjadi Perdana Menteri. Kita tidak ubah janji Dr. Mahathir tetapi beliau yang mengubah janjinya kepada kita," katanya.

Buktinya, jelas Perdana Menteri, setelah 21 tahun, 400 keluarga terlibat hari ini akan memperoleh rumah teres setingkat masing-masing di sini.

UM - 17/8/2017 P3